

KOROSO

Paoro Iokanatsopatakiti Koroso Auakanimoni

1 ¹Nota Paoro. Niokanatsopata hītemoni. Teoso mereēno nota, kotxi inirekari nota Xesosi Kristo iokanatakiti nininiua. Aītari Tximótxio apaka iokanapireta hītemoni. ²Ininiã aiokanatari ia iōkatsopari Teoso nakitiakorimoni, ikinika Teoso paniātakiti kamakanimoni Koroso sitatxiti auakanimoni. Aītariakori hītxaua. Aīri Teoso, Apiananiri Xesosi Kristo pakini sikari ikinipoko erekari hītemoni. Ninoa kamaerekaxiniretai hīte.

Teoso Misākiretiko Koroso

Auakani Īkapani

³“Erekapitikai,” atxari Teoso, aãuīte Xesosi Kristo iri, iua amisākiretakasaaki hīte ĩkapani. Ātipirika amisākiretari Teoso hīte ĩkapani. ⁴Ikara atoko atxari Teoso, kotxi ate kenakopiretari hīte auikiniri Kristo Xesosi sākire. Apaka akenakopiretari hīte tiretiniri ikinika kākiti Teoso nakitiakori. ⁵Teoso iokanapirena erekari atão sākiretxiti itxaua. Ikara hīkenakotakasaaki, hīkenakotari Teoso sikaenetakiti ipotetakiti itixineē hīte ĩkapani, ininiã hiātapari hāpakapiniri Teoso sikaenetakiti. Himarotari hāpakapiniri, ininiã Teoso sākire hāuikini aua, hītiraōkiuatini pakini aua. ⁶Teoso iokanapirena erekari hīkenakotakiti iaripiretapeka ikini itixitimoni. Ikiniōtika apikomoni kākiti kenakotari. Iuasaaki kākiti auikaāpotari Teoso iokanapirena. Ikiniōtika kākiti apakapari erekari Teoso

sikakiti. Iua atokokana hĩte kenakotari Teoso iokanapirena erekari. Iuasaaki himarotari ikinipoko erekari Teoso sikakiti. Iuasaaki himarotari Teoso atão sikiniri ikinipoko erekari kãkitimoni.

⁷Amoianari, atiretakiti, Epápara inakori, iuara oerekai Teoso sikiniri ikinipoko erekari kãkitimoni. Iua Kristo nitiri itxaua. Ātipirika iparĩkauata Kristo ĩkapani, ininiã ātipirika iparĩkauata hĩte ĩkapani.

⁸Iua sãpiretaua ate hĩtiraõki, Erekar Matamatakoti siãkiti hĩtemoni.

⁹Hĩte pirena akenakopiretakasaaki, ātipirika amisãkiretari Teoso hĩte ĩkapani. Ate nirekari hĩte iteene imarotiniiri Teoso nireẽkiti hĩkamini ĩkapani. Anirekari kiĩkiteni hininiãua. Anirekari himarotiniiri Teoso imarore Erekar Matamatakoti siãkiti.

¹⁰Ininiã ate misãkiretari Teoso hĩte atão hĩkamini ikiniõtika, kotxi Apiananiri anaakori hĩtxaua. Anirekari hĩkamakiti kamapoxokonitiniiri Teoso. Ininiã hĩkamakiti ikiniõtika erekarinoka, amãtiiri erekari atoko. Ininiã ikiniõtika himaroãpotari apikomoni Teoso nireẽkiti. ¹¹Anirekari Teoso sikataparaxiniretinii hĩte iposotiireẽ, kotxi kaposotiireri iua. Ininiã iuasaaki hiãtapari himisiritiko xipokini. Iuasaaki !hinaiataua. Iuasaaki hĩposotari himĩteenekiniri himisiritiko hĩpoxokoniritika. ¹²Iuasaaki hĩtxariko aĩri: “Erekapitikai,” kotxi iua kamaerekataua. Ininiã aãpakapari iua potetakiti inakitiakori ĩkapani Teoso tixineẽ, ipiã mauakaniãtaã. ¹³Iua sikakaua ipiã posotiireẽ aãuakasaaki, maerekati posotiireẽ aãuakasaaki. Iua anikaua imi itiretakiti auiniãtaã. Iuaãtaã auakani auĩte itxaua imi. ¹⁴Imi Kristo ĩĩkitxitari Teoso amaerekani ĩki ipĩkasaaki, ininiã Teoso makatxakari amaerekani. Ixinikaikari amaerekani.

Kristo Apiananiri

¹⁵Kãkiti kona posotari atamatiniiri Teoso. Teosotxikana itxaua Kristo, iuaritika aposotari Kristo aãtamati. Ikinipoko kamiko apisa, Kristo aua Teosokata. ¹⁶Iua kamari ikinipoko. Ikamari iaxiti auakani, uai itixi auakani apaka. Ikamari ikinipoko kãkiti atamatakiti, kãkiti matamatakiniti apaka. Ikamari ikinika kaposotiirerini, auĩtetxiakori matamatakoni, ikinika Teoso nitiriakori pakini. Ikamari ikinika. Ikinika kamaãka iua ĩkapani. ¹⁷Kristo aua ikinipoko apisa. Iua maĩkari ikinika imaxipokakani ĩkapani. Ikara atoko ininiã, ikinipoko auapanika. Iua mauakaniã, ikinika iarika. Iua mauakaniã, ikinipoko xipoka.

¹⁸Kãkiti Teoso mereẽkini Kristo ĩto atoko itxauana. Teoso mereẽkini kii atoko itxa Kristo. Merepitipanika ipĩkari õkitikakariua

iua. Ininiã õkitikasaakiua, oerekari kãkiti Apiananiri ininiua. ãti kaposotiireri iua atokokana inakari !auari. ¹⁹Teosotxikana iua. Ikinika Teosomoni auakari aua iuamoni. Ikara atoko Teoso apokaerekatari. ²⁰Kristo arêka xiketakasaaki aamina ïpiriãmitakari nopini, iusaaki Kristo xipokari Teoso omanãkarauatini kãkiti maerekani xika. Kotxi Teoso nirekari Kristo mininiri ikinipoko iuaĩkana iuamoni, ïkorapokoriti auakani, iaxiti auakani pakini. Ininiã uatxa Teoso apakapari Kristo sãkire auiãkani.

Kristo Kamakiti Koroso

Auakani ïkapani

²¹Hĩtepekana, mitxi !himarotari Teoso. Iusaaki !hãuari Teosokata. Maerekati hĩkamakiti xika homanatarari Teoso hãkixinireẽ. Teoso mokaiakariakori hĩtxaua iusaaki. Uatxa Teoso apakapai hĩte, ²²kotxi Kristo ïto ipina hĩte ïkapani. Ininiã iua anikai hĩte Teosomoni iua makatxakakini hininiua ïkapani. Teosomoni himaerekani !auaika, kotxi Kristo makatxakapekari imakinika himaerekani. Teoso apisatoõ hãpokasaaki, kona ãti posotari apoĩtinii himaerekani xika. ²³Ikara atoko aua hĩtemoni, iteene hãuikiniãri Kristo sãkire ikiniõtika, Kristo sãkirenoka hãuikiniã, isãkire himatakanapakaniã. Ikara atoko hĩkaminĩã, apanakini kona txĩkitakai hĩtakanapiniri hiãtapiniri ikinika Teoso kamakiti hĩte ïkapani. Teoso iokanapirena erekari sãpiretaua ikinika Teoso kamakiti inakitiakori ïkapani. Hĩte kenakotapekari Teoso iokanapirena erekari. Isãpiretaãkapeka ikinika itixi auakanimoni. Nota Paoro Teoso nitiri, iua iokanapirena erekari ikinimane nisãpiretini ïkapani.

Paoro Parĩkauata Kãkiti Teoso Mereẽkini ïkapani

²⁴Uatxa nipoxokoniua hĩte ïkapani natatsiirauatini, kotxi natatsiirauatini xika hĩte auikari Kristo sãkire. Natatsiirauata niĩtoã Teoso mereẽkini ïkapani. Kristo ïto atoko itxauana kãkiti Teoso mereẽkini. Natatsiirauatapitika, iuaritika Kristo atatsiirauatini apiata. ²⁵Teoso iokanatano nota imereẽkini nitiri nininiua. Ipaniãtano nisãpiretiniri ikinika isãkire hĩtemoni. ²⁶Ipaniãtano nisãpiretinii mitxi kãkiti mimarotakiniti. Okananipeka Teoso !oerekari ikara kãkiti mimarotakiniti. Kristo ipinini apisa ikini itixiti auakani !imarotari ikara.

Mitxi kākiti mimarotakiniti uatxa oerekaãka Teoso nakitiakorimoni. ²⁷Uatxa Teoso nirekari inakitiakori Xoteo minakanuia imarotiniri mitxi kākiti mimarotakiniti, kotxi peerekari. Natokopa itxa ikara kākiti mimarotakiniti? Nisãpiretai. Kristo posotari kākiti ãkixinireẽ auini. Ia mitxi kākiti mimarotakiniti. Kristo aua hãkixinireẽ. Ininiã himarotari hĩsini Teoso tixinemoni. ²⁸Ininiã asãpiretari kākiti Kristo pirena. Aõtãkikari ikinimane Teoso imaroreẽ. Aõerekari ikinimane Teoso imaroreẽ, kotxi Teoso sikaimaroretua. Iua aua ikinika imaroretxi. Ikara atoko aanikana Kristo nireẽkitinoka kamakani Teosomoni. ²⁹Ikara nikamini ĩkapani, niparĩkauatipitipo. Pasãpaniri. Kristo posotiireẽ niparĩkauata, kotxi kaposotiireri iua. Iua iteene sikataparatarari nãkixinire, ininiã niposotari iteene niparĩkauatini iua ĩkapani.

Paoro Nirekakiti

2 ¹Ninirekari himarotiniri iteene nimisiritiko hĩte ĩkapani. Apaka iteene nimisiritaãka Araotxiséia sitatxiti auakani ĩkapani. Nimisiritaãka apanakini nimataõkitakini ĩkapani apaka. ²Ninirekari ikinimane ninoa kataparaxinire ininina. Apaka ninirekana itiretakiniuana, ininiã ãtika ninoa nireẽkiti. Ikara atoko ininiãna, iteene imarotarina ikinika Teoso sãkire. Iuasaaki imarotarina Kristo, mitxi kākiti mimarotakiniti, mitxi aĩri Teoso moerekakiniti. ³Paimatireri Kristo. Iua mimarotakiniti !auari. Ikinipoko imarota. ⁴Ikara atoko nisãpiretai hĩte, apanakini mamisirienetakani tĩkane kākiti imaroreẽ. ⁵Nĩto !auari hĩtekata, iuaritika nixinikapikai hĩte nãkixinireẽ. Nipoxokoniuaata, kotxi nimarotari hĩkamakiti atão inini. Apaka nipoxokoniuaata, kotxi hĩte iteene auikari Kristo sãkire.

Atão Kristo Sãkire Auiãkani Kamakiti

⁶Hãpakapapekari Kristo Xesosi hãauĩte ininiua ĩkapani, ininiã hĩkamariko inirekakiti ikiniõtika. ⁷Iua taparanoka hĩkosekako. Aãkotsa kosekiniri ãparaã atoko hĩtxako. Ikara atoko hininiã, kataparari hĩxinire. Ininiã atão hãuikari Kristo sãkire mitxi aõerekakiti atoko, ininiã kataparaiko. Ininiã iteene hĩtxariko Teoso: “Ikinika pikamakiti ate ĩkapani peerekari,” hĩtxako.

⁸Erepaniko. Kona hãuiritapiri kākiti makatxakinii Teoso kimaporeẽ. !Hãuikapiri ninoa sãkire, kotxi ãtião ninoa sãkire. Na atão isãkirena. Kākiti imarorenoka imarotana. Kamisirienererini ninoa. Maxikatĩka isãkirauatana. Kitxakapirĩka auakani

sāpiretakiti ninoa sākire. Īkorapokoriti auakani nireēkiti maerekati isāpiretana kākiti. Kona Kristo sākireni.

Apiananiri Itxaua Kristo

⁹Kristo aua iĭto, iuaritika Teosotxikana iua. Kristo aua ikinipoko Teoso posotiire, ikinipoko itiraōki, ikinipoko imarore, txaāpokata, kotxi Teoso itxaua. ¹⁰Kristo aua hākixinireē, ininiā ikinipoko aua hĭtemoni. !Auari apikomoni hinirekakiti, kotxi auĭtetxiakori iaxiti auakani auĭte itxaua. Apiananiri itxaua. Kaposotiireri iua atoko inakari !auari.

Kristo Kamakiti Hĭte ĩkapani

¹¹Hāpakapapekari Teoso takaōtxikare kākiti mataākiniti. Hākixinireē Teoso takari itakaōtxikare. Kristo makatxakasaakiri himaerekani hĭito nireēkiti, iusaaki hāpakapari Teoso takaōtxikare. ¹²Hĭpatxisatikosaaki, Kristokata ikatakoni atoko hĭtxaua. Eereka hōkitikaāka Kristo ōkitikiko atoko. Hĭte ōkitikaākako, kotxi hĭte auikari Teoso posotiire Kristo ōkitikini ipĭkasaaki.

¹³Mĭtxi ipĭkani atoko hĭtxaua himaerekani xika. Xoteo minakaniua hĭte, ininiā mĭtxi kona himarotari Teoso nireēkiti. Hĭponaniākasaaki, maerekati auape hĭtemoni. Iuaritika Teoso txĭkitakai auāki hinini Kristokata. Teoso makatxakari ikinipoko himaerekani. !Ixinikaikari himaerekani. ¹⁴Iua oakari iōkatsopatakori amaerekani sāpiretiko. Ikara iōkatsopatakori sāpiretari amisiritiko amaerekani xika. Amitekini !auari. Amisiritiko auapitika. Iuaritika iua oakari ikara iōkatsopatakori. Imakatxakari ikara iōkatsopatakori. Īpiriāmitakari nopini Kristo tokakitikosaaki, ikara iōkatsopatakori tokakitaāka apaka iuaā, ininiā !itxaika. Iusaaki amisiritiko !auaika. ¹⁵Kristo ĩpiriāmitakari nopini ipĭkasaaki, iusaaki imakatxakari ikinika Satanasi posotiire, inĭtiriakori posotiire pakini. Iua oerekari ikinimane !kaposotiirena ninoa. Iua ōkitikasaakiua, oerekari ikinimane iuananira Apiananiri ininiua. Iusaaki Kristo oerekari ikinimane ikāiatini.

¹⁶Ininiā kona hāuiritapiri apanakini txitinii hinikakiti xika, hiātakiti xika pakini. Kona hāuiritapiri apanakini txitinii kiiniri Teoso ĩkapani hĭkamini xika, kiiniri kasiri itopaĭtakasaaki hĭkamini xika, kiiniri tomatiko ōti hĭkamakiti xika pakini. ¹⁷Kiiniri Teoso ĩkapani ĩkorasaaki sanōkatxi atoko itxa. Oerekaua atāo inakari, txamari na iteene oerekaua. Iteene oerekaāka atemoni, Kristo aōkitakasaaki. ¹⁸Erepaniko kākiti

ia atoko inakari: Ninoa iuikari imiukakaniuana. Ninoa teosonetari Teoso nitiriakori matamatakoni. Ninoa sápiretari kákiti matamatakoni aókitinina itaponeēna. Ixinikarina ninoaka nireēkitinoka. Ixinikarina kimarorerini ininiuana, ininiã iuikauana. Erepaniko kákiti ikara atoko inakani. Hãuikiniãri ninoa sákire, !auaika hĩparĩka ìki. ¹⁹Kákiti ikara atoko inakani !inirekari Kristo iauĩtena ininiu. Kotxi Kristo akii atoko itxa. Ate iua ìto atoko atxaua. Ikara atoko ininiã, isikataparataua. Aãpotiĩtaua. Asikataparatakakaua. Átika ìtotxi atoko atxaua. Ikara atoko aniniã, aimaroãpotari isákire. Aaneē, kákiti ìto aneini atoko.

Apinini, Aãuini Pakini Kristokata

²⁰Mitxi hinireēkiti itixi auakani nireēkiti atoko. Hãuikasaakiri Kristo sákire, mitxi hinireēkiti !auaika. Ipĩpe. Txamari hĩkamapanikari ìkorapokoriti auakani kamakiti atoko. Ninoa nireēkiti iaóka hĩkamapanika. ²¹Ninoa txari: “Kona pimaĩkapiri ikara. Kona pinikapiri ikara nipokori. Kona piouãtakapiri ikara.” Kinirepa hĩkĩpitari ikara isákirena? ²²Ninoa paniãtakiti xipokapitikako. Ikara atoko !itxa, kotxi ikara atoko inakari paniãtakori kákitinoka paniãtakiti. Kákiti oerekakiti sákiretxitinoka ikara. ²³Kákiti uãkatari ninoa paniãtakiti kimarorerini paniãtakiti atoko. Ninoa xinikakiti iaóka inirekarina Teoso. “!Erekano,” itxana, txamari ãkixinireēna itxana “Peerekano.” Ninoaka misiritaua ìtoãna. Ikamarina ikinika ìtona nireēkiti.

Atão Hĩkamakiti Erekarì

Hãuini Ìkapani

3 ¹Hĩte ókitikaãka Kristokata hãuini amaneri inini ìkapani, ininiã hinirekariko hĩkaminiri Teoso tixine auakani kamakiti iaóka. Iuaã Kristo topãkanãta Teoso kikomoni. Apiananiri itxaua Teoso kikomoni topãkakari. ²Hĩxinikariko Teoso tixine. Kona hĩxinikapiri ìkorapokoriti. ³Ipĩkani atokopeka hĩtxa, kotxi hãuini kitxakari !auaika, ininiã kona hĩxinikaikari ìkorapokoriti auakari. Teoso sákire mauĩãkani !imarotari hãuini amaneri Kristokata Teoso auiniãtaã. ⁴Kristo txĩkitakari aãuini amaneri inini. Iua uai apokasaaki iuaĩkana atamataãka. Iuasaaki hĩte apaka atamataãka iuakata. Iuasaaki hĩtemoni auari Kristo iotximere atokokana. ⁵Hĩxipokariko hĩto nireēkiti, kotxi ìkorapokoriti auakari nirekari ìtotxi nireēkitinoka. Hókariko. Kipa aua aãkixinireē aókini ìkapani? Auari anokaretxi.

Auari aĩto nireẽkitinoka kamiko nirekiko. Auari aĩti ĩto nirekiko. Apaka auari aĩti nakiti nirekiko aãkixinireẽ. Iteene anirekiniãri aĩti nakiti, ateosone atoko itxaua anireẽkiti. ⁶Ikara maerekati xika, Teoso omanãkare apokapitikako Teoso paniãtakiti makĩpitakanimoni. ⁷Mitxi hĩte kamari maerekati ikara atoko inakari. Iuasaaki hĩtotapekari ikara atoko inakari hĩkamini. ⁸Uatxa ia atoko inakari hĩtakanapako: omanãkaretxi, aĩti iteene txitiko, Teoso misãkirepiretiko, maerekati sãkiretxiti pakini. ⁹Kona himisirienetakapeua, kotxi hĩtakanapapekari maerekati mitxi hĩkamakiti. Himãka kitxakari hõkini atoko, hĩtakanapapekari ikara maerekati.

¹⁰Uatxa hĩkamakiti amaneri. Himãka amaneri hĩeretakini atoko, hĩkamakiti uatxa amaneri. Teoso txĩkitakari hĩkamakiti amaneri inini, ininiã himarotari atão inakari imaroretxi. Ininiã Teoso kamakiti atokokana hĩkama, kotxi hĩte kamakari itxaua. ¹¹Uatxa kãkiti apiari !auari. Kreoakori, Xoteoakori, Teoso takaõtxikare auaĩtotakini, Teoso takaõtxikare mauaĩtotakini, mimaroreni, kãkiti ĩtopa auakani, nitiritxi amotakoni, kãkiti miamotakoni pakini !auari kãkiti apiari. Aĩti kãkiti aĩti kãkititxikana, kotxi Kristonoka Apiananiri. Iua aua ikinimane isãkire auiãkani ãkixinireẽ.

¹²Ininiãkara hiamonĩkariko aĩti. Hĩkamariko erekari aĩtimoni. !Hĩuikapeua. Kaneenama !hĩtxape. !Katimari homanãkarauatini. Ikara atoko hãuako, kotxi Teoso mereẽkini, iua nakitiakori, itiretakini hĩtxaua. ¹³Himĩteenekakakauako. Himaxinĩkaretariko apanakini kamakiti, hĩte mapokaerekatakiniti. Kristo maxinĩkaretapekari maerekati hĩte kamakiti, ininiã iua atokotxikana himaxinĩkaretariko maerekati apanakini kamakiti hĩtemoni. ¹⁴Ikara erekari hĩkamako. Erekari apiari hĩkamini, hĩtiraõkiuatini. Hĩtiraõkiuatako. Hĩtiraõkiuatakasaaki, ininiã iuasaaki ikinika hĩkamakiti atão.

¹⁵Kristo kamaerekaxiniretai, ininiã erekari hãkixinire. Hãuiritariko ikara erekari kaikotini. !Hĩkamapiri ikara erekari makatxakiko ĩkapani. Hĩkinika aĩtika ĩtotxi atoko hĩtxaua. Teoso akiritai hĩte hãkixinire ereka inini ĩkapani. Hĩtxariko Teoso aĩtipirika: “Erekapitikari pikamakiti nota ĩkapani,” hĩtxako. ¹⁶Hãuiritariko ikinika Kristo sãkire kaikotini hãkixinireẽ, ininiã iuasaaki himarore iteene aua. Hõerekakakaua. Hõtãkikakakaua. Hĩxikaretari xikari Teoso ĩkapani. Hĩxikaretariko xikari Teoso sãkire iõkatsopatakori xikariti. Hĩxikaretariko xikari kitxakari, amaneri pakini Teoso ĩkapani. Hĩxikarauatakasaaki,

hākixinireē hītchariko Teoso: “Erekapitikari pikamakiti nota ĩkapani.” ¹⁷Ikinika hĳkamakiti hĳkamako Apiananiri Xesosi ĩkapani. Hĳsākirauatakasaaki, hĳsākirauata Apiananiri Xesosi ĩkapani. Iuasaaki hītchariko aĳri Teoso: “Erekapitikari pikamakiti nota ĩkapani,” hītchariko.

Kākiti Aapoko Auakani Ōtākikiko

¹⁸Hĳte ĳtanorotxi, hĳkĳpitariko hĳtaniri sākire, kotxi Apiananiri nakiti hĳtxaua, ininiā ikara atāo hĳkamini.

¹⁹Hĳte ĳtaniritxi, hĳtĳretaroko hĳtanoro. Kona hĳtĳtapero oa. Kona homanatapero.

²⁰Hĳte amarini, hĳkĳpitariko hĳri, hinoro pakini sākire. Ikinika ninoa paniātakiti hĳkamako, kotxi Teoso apokaerekatari ikara atoko inakari.

²¹Hĳte irĳtxi, kona hĳkamanaiamanetapena hamariteakori, kotxi eereka maerekaxinireti aua ninoamoni, ininiā ĳnĳrekaikarina hĳte paniātakiti ikaminina.

²²Hĳte nitiritxi, hĳpatrāote ĳkorapokoriti aua, ininiā hĳkamariko ikinika ninoa paniātakiti. Apanakini iteene parĳkauata ipatrāote apisatoō, iua apokaerekatiniri ĩkapani. Iua mauakanisaaki apaka iteene hĳparĳkauatako. Ikini hĳxinĳreritika hĳkamariko hĳparĳka. Ikara atoko ininiā, atāo hĳpaxitari Teoso. ²³Ikinika hĳkamakiti hĳkamako hĳtaparaxinĳreritika. Hĳparĳkauatakasaaki, parĳkatxi Apiananiri ĩkapani hĳkamini atokotxikana, hĳparĳkauata kākiti ĩkapani. ²⁴Hĳparĳkauatako ikara atoko, kotxi himarotari Apiananiri sikinii ipotetakiti iaxitĳkiri hĳparĳka ĳki. Itixine hĳpokasaaki, hĳpakapariko. Apiananiri Kristo nitiriakori hĳtxaua. ²⁵Maerekati kamakari apakapariko imisiritiko. Teoso misiritari āti maerekati kamakari, āti maerekati kamakari imisiritini atokotxikana.

4 ¹Hĳte patrāo, hĳkamariko atāo inakari hĳnitiriakori ĩkapani. Kona himisĳrienetapena ninoa. Kotxi hĳte apaka aua hĳpatrāote Teoso tixineē.

Apikomoni Paoro Ōtakikakiti

²Kona hĳtakanapapiri Teoso himisākiretini. Araōkire hĳtxako maerekati mapokakani ĩkapani. Ātipirika hĳtchariko Teoso: “Erekapitikari ĳkinipoko pikamakiti nota ĩkapani,” hĳtchariko iua.

³Apaka himisākiretariko Teoso ate ĩkapani. Hamanaāriko Teoso, iua oerekinĳua isākire apanakinimoni asāpiretini ĩkapani,

kotxi anirekari asãpiretiniri kãkiti Kristo pirena, mitxi kãkiti mimarotakiniti. Ikara nisãpiretini xika, kateia ãki naua.

⁴Himisãkiretariko Teoso, Kristo pirena atão nisãpiretini ïkapani, kãkiti atão imarotini ïkapani.

⁵Kimarorerini hïtxauako Teoso sãkire mauïãkani sauaki hãuakasaaki. Aãuini poião, ininiã ikiniõtika hinitari kãkiti Teoso sãkire hïsãpiretini ïkapani.

⁶Teoso sikapekai ikinipoko erekari, ininiã hïsãkirauatakasaaki, hõerekari kãkiti hïsãkireẽ hïtoretinina. Iõkira mauakaniã nipokoriã, ïkaposeri. Iua atokotxikana erekari mauakaniã hïsãkireẽ, kãkiti ïnirekari ikenakotiniri hïsãkire. Erekari hïsãkire ininiã, himarotari hãpakapapiretiniri kãkiti.

Paoro Iokanapiretini Pirena

⁷Txíkiko inakori sãpiretaiko ikinika nota pirena. Aïtari, atiretakiti itxaua. Iua parïkauatapitipo Apiananiri ïkapani. Apiananiri nitiri itxaua atekata. ⁸Niokanatarari iua hïtemoni, hïte imaropiretini ïkapani, hïte isikataparaxiniretini ïkapani. ⁹Niokanatarari Onésimo inakori apaka iuakata. Koroso sitatxitikiri iua, hïte atoko. Aïtari atiretakiti itxaua apaka. Ätipirika atão iparïkauata Kristo ïkapani. Ninoa sãpiretaiko hïte ikinipoko Kristo sãkire auïãkani kamakiti uai.

¹⁰Arisitako inakori, notakata kateia ãki auakari, xinikamanapitai hïte. Panapee itaro ãkiri Marko, xinikamanapitai hïte apaka. Nisãpiretapekai hïte Marko pirena. Ininiã ereẽ iua apokasaaki, hïpoxokoniritika hãpakapariko iua. ¹¹Xosoe Xósito inakori xinikamanapitai hïte apaka. Ninoa ipi äti pakini Xoteoakori notakata parïkauatakani itxauana. Ninoa parïkauata notakata, Teoso auïtetxi ininiua pirena asãpiretini ïkapani. Isikataparaxiniretanona nota.

¹²Epãpara inakori apaka xinikamanapitai hïte. Ereëkiri iua. Kristo nitiri itxaua. Ätipirika imisãkiretari Teoso hïte ïkapani, Teoso nireëkitinoka hïkamini ïkapani, ikinika hïkamakiti atãonoka hïkamini ïkapani. ¹³Nota imarotari iteene iparïkauatini hïte ïkapani. Apaka nimarotari iparïkauata kãkiti Araotxiséia sitatxiti auakani ïkapani. Apaka nimarotari iparïkauata Ierapori sitatxiti auakani ïkapani.

¹⁴Aïtari atiretakiti, amianari imarotakari Arókasi inakori apaka xinikamanapitai hïte. Témasi inakori apaka xinikamanapitai hïte. ¹⁵Hïsãpiretanako aïtariakori Araotxiséia auakani nixinikinina

ninoa. Hīsāpiretaroko Nīpa inakoro, Teoso mereēkini oaāpoko apotiitakaniua pakini, nixinikinina ninoa. ¹⁶Ia niokanatsopatakiti hātatsopatako hīkinika hīkenakotini īkapani, eereka hīpaniātariko atatsopatiko Araotxiséia sitatxitiā, Kristo sākire auiākani kenakotiniri īkapani. Apaka hīte atatsopatariko Araotxiséia auakani iokanatsopatakiti. ¹⁷Hītchariko Akipo inakori: “Pikamariko ikinipoko parīkatxi Apiananiri paniātakiti pikamini.” ¹⁸Nota Paoro niōkatsopatari ia niuakoā: Hīxinikariko kateia āki nauini. Teoso sikari ikinipoko erekari hītemoni. Ameē.